

Morning Regional Dogri News Bulletin, 11th Feb, 2025

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. प्रधानमंत्री नरेन्द्र मोदी होर अज्ज फ्रांस दे राष्ट्रपति इमैनुअल मैक्रो हुंदे कन्नै दपक्खी गल्लबात करगन।
2. मुख्यमंत्री उमर अब्दुल्ला होरें गृहमंत्री अमित शाह हुंदे कन्नै मलाटी कीती ते जम्मू कश्मीर दा राज्य दा दर्जा फही ब्हाल करने ते होरने मामलें पर चर्चा कीती।
3. जनजातीय मामले सरबन्धी मंत्री जावेद अहमद राणा होरें जम्मू विश्वविद्यालय च जनजातीय भाषाएं दा इक केन्द्र खोलने दा समर्थन कीता ऐ।
4. जम्मू कश्मीर विधानसभा दी कारोबारी नियमें दी कमेटी अज्ज अपनी चौथी बैठक लाग, जेह्दे च मसोदे गी मुकदा रूप देने दी संभावना ऐ।
5. जम्मू कश्मीर च पिछले 5एं ब'रे दरान इंकम टैक्स रिटर्न भरने आले लोकें दी गिनतरी च टकोह्दा बाद्धा होआ ऐ।

PM- France Visit

प्रधानमंत्री नरेन्द्र मोदी होर अज्ज पेरिस च फ्रांस दे राष्ट्रपति इमैनुअल मैक्रो हुंदे कन्नै गल्लबात करगन। इस वार्ता दा उद्देश्य भारत-फ्रांस सरबंधें गी होर मजबूत करना ऐ। मोदी होर केई प्रमुख दपक्खी वार्ताएं च बी हिस्सा लैंगन। इस दरान भारत ते फ्रांस बश्कार केई महत्वपूर्ण दपक्खी समझौतेँ उपपर दस्तखत होने दी मेद ऐ। प्रधानमंत्री होर अज्ज उत्थें ए.आई.एकशन शिखर सम्मेलन च बी हिस्सा लैंगन। भारत इस सम्मेलन दी सह-अध्यक्षता करा'रदा ऐ। एहदा उद्देश्य ए.आई.दे क्षेत्र च वैश्विक मानक स्थापत करना ऐ। फ्रांस यात्रा उपपर पुज्जने परैत प्रधानमंत्री हुंदा शानदार सुआगत होआ। फ्रांस च कार्यक्रमें च हिस्सा लैने मगरा प्रधानमंत्री होर अमरीका दे राष्ट्रपति डोनोल्ड ट्रंप हुंदे साददे उपपर दो दिनें दी अमरीका यात्रा उपपर जांगन। ओह कल मार्सिले थमां अमरीका रवाना होंगन। इस दरान प्रधानमंत्री होरें अमरीका दे उप-राष्ट्रपति जे.डी. वेन्स हुंदे कन्नै बी गल्लबात कीती।

<><><><><><>श

Omar-Shah Meet

मुख्यमंत्री उमर अब्दुल्ला होर केन्द्री गृहमंत्री अमित शाह हुंदे कन्नै नमीं दिल्ली च मलाटी कीती। आकाशवाणी जम्मू संवाददाता दी रिपोर्ट मूजब मलाटी मगरा उमर अब्दुल्ला होरें आखेआ जे गृहमंत्री हुंदे कन्नै महत्वै आले मामलें पर चर्चा होई। उनें मीडिया कन्नै गल्ल करदे होई आखेआ जे केई सारे मामलें पर चर्चा होई जेह्दे च जम्मू कश्मीर दा राज्य दा दर्जा परताना, सुरक्षा स्थिति ते विधानसभा औंदे बजट सत्र बी शामिल ऐ। जम्मू कश्मीर दे मुख्यमंत्री दा औह्दा संभालने मगरा एह उमर अब्दुल्ला हुंदी गृहमंत्री हुंदी त्रीह मलाटी ऐ। मुख्यमंत्री दे औह्दे दा कम्मकाल संभालने मगरा 23 अक्तूबर 2024 गी पैहली बैठक ते 19 दिसम्बर 2024 गी दूई बैठक गृहमंत्री हुंदे कन्नै लाई ही। उनें जम्मू कश्मीर दा राज्य दा दर्जा वापस परताने ते होर दुए मामलें पर चर्चा कीती।

<><><><><><>

Tribal AffairsMin(byte)

जनजातीय मामले दे मंत्री जावेद अहमद राणा होरें कल जम्मू विश्वविद्यालय च जनजातीय भाषाएं सरबन्धी इक केन्द्र खोलने दी वकालत कीती ऐ। एह गल्ल उनें जम्मू विश्वविद्यालय दे उर्दू विभाग ते जम्मू कश्मीर कला, संस्कृति ते भाषाएं सरबन्धी अकादमी आस्सेआ आयोजित “उर्दूते गोजरी” बश्कार सरबन्धे विषय पर प्रदेश सतह दे इक सैमीनार दरान आक्खी। मंत्री होरें आखेआ जे इस प्रस्तावित केन्द्र कन्नै जम्मू कश्मीर दी जनजातीय भाषाएं गी बढ़ावा देने, लिखित रूप देने ते शोध करने दा इक मंच उपलब्ध होग। मंत्री होर उत्थें मजूद लोकें गी संबोधत करा’रदे हे। अपने संबोधन च उनें आखेआ जे जम्मू कश्मीर च गोजरी भाषा मुख्य भाषा दे तोर पर बोली जंदी ऐ। एह्दे इतिहास बारे बोलदे होई मंत्री होरें रामायण ते महाभारत च किश गोजरी लफ्जें दे इस्तेमाल बारे मिसाल बी दित्ती। इस सैमीनार दा उद्घाटन जनजातीय मामले दे मंत्री जावेद अहमद राणा होरें कीता जेह्दी सदरत जम्मू विश्वविद्यालय दे वाइस चांसलर उमेश राय होरें कीती। उद्घाटन मगरा मीडिया आलें कन्नै गल्ल करदे होई मंत्री होरें आखेआ.....बाईट

<><><><><><>

Speaker-House Committee

जम्मू कश्मीर विधानसभा दे स्पीकर अब्दुल रहीम राथर हुंदी अध्यक्षता च कल जम्मू च सदन समिति दी बैठक होई जेह्दे च विधानसभा दे बक्ख-बक्ख सदस्यें आस्सेआ पुट्टे गेदे मुद्दें पर चर्चा कीती गई। विधायक सुनील कुमार शर्मा जेह्ड़े विपक्ष दे नेता बी ऐन। गुलाम अहमद मीर, नाजीर अहमद खान(गुरेजी), सुरजीत सिंह सलाथिया, अली मोहम्मद डार, जावेद हसन बेग, चौधरी मोहम्मद अकरम ते वहीद-उर-रहमान पर्रा, कमेटी दे सदस्य दे तौरा पर मजूद हे। कमेटी नै जम्मू ते श्रीनगर च रौहने दरान पेश आवा’रदिएं दिक्कतें परेशानिएं ते सरबन्ध मुद्दें बारे चर्चा कीती। इनें तफसीली चर्चां दरान विधायकें अपने सुझाह पेश कीते। स्पीकर होरें उनेंगी

भरोसा दोआया जे आवास सरबंधी मुद्दे सने हुंदे सब्बने सुझाएं गी तौले गै हल करने लेई सरकारी जरूरी गैह पुट्टग। बैठक च जम्मू कश्मीर विधानसभा दे सचिव मनोज कुमार पंडित ते होरने वरिष्ठ अधिकारी बी शामिल होए।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उपपर 15 फरवरी 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Bussiness Rules Committee

जम्मू कश्मीर विधानसभा दी कारोबारी नियमें दी कमेटी अज्ज अपनी चौथी बैठक करोग जेहदे च सदस्येंग ी दित्ते गेदे संशोधित नियमें दे मसोदे पर बचार बमर्श करने ते मुकदा रूप देने दी संभावना ऐ। आकाशवाणी दे जम्मू संवाददाता नै जानकारी दित्ती ऐ जे एह बैठक केई सदस्यें आस्सेआ शुरूआती मसोदे गी सखल्ला बनाने सरबंधी दित्ते गेदे सुझाएं मगरा कीती जाग। पिछली बैठक च किश सदस्यें नियमें दे मसोदे गी होर सखल्ला बनाने दी लोड़ पर जोर भरेआ हा ते विधानसभा सचिवालय गी दस्तोवेज गी असानी कन्नै समझने ते प्रतिक्रिया देने साब्वै तैआर करने दी गुजारश कीती ही। एहदी पच्छसेकड़ै च स्पीकर होर अज्जै दी बैठक लांगन। मन्नेआ जा'रदा ऐ जे नमें सिरेआ तैआर कीते गेदे मसोदे गी मते सारे विधायकें दी सैहमति दे मगरा उपराज्यपाल मनोज सिन्हा हुंदे कोल मंजूरी लेई पेश कीते जाई सकदा ऐ। जेकर सब किश योजना मताबक होंदा ऐ। तां नमें नियमें गी विधानमंडल दे बजट सत्र शा पैहले लागू करने दी मेद ऐ, जेहदा 3 मार्च थमां शुरू होने आला ऐ।

<><><><><><>

ITR Filers

जम्मू कश्मीर च पिछले 5 एं बरें दरान इंकम टैक्स रिटर्न भरने आले लोकें दी गिनतरी च टकोह्दा बाद्धा होआ ऐ। आकाशवाणी दे जम्मू संवाददाता दी रिपोर्ट मूजब वित्त मंत्रालय आस्सेआ लोकसभा जम्मू कश्मीर च आयकर रिटर्न दाखल करने आलें दी गिनतरी 2019–20 च 4 लक्ख 49 ज्हार ही जेह्ड़ी 2024–25 च 6 लक्ख 43 ज्हार 197 होई गई। टैक्स भरने आले च बाद्धा पूरे भारत च इक व्यापक रुझान च हिस्सा ऐ। सरकार आस्सेआ कीते गेदे डिजीटल सुधारें, टैक्स गी सखल्ला बनाने ते होरनें चीजें गी बढावा देने करी आमदन घोषत करने आस्तै प्रोत्साहित कीता ऐ। टैक्स फाइल करने आलें च बाद्धा इक खरी सारत ऐ ते इंदे च 59 फीसद लोकें आखेआ जे उंदी टैक्स सरबंधी कोई लाइबिलिटी नेई ऐ।

<><><><><><>

Animal Husbandry(byte)

रामबन जिले च पशुपालन विभाग आस्सेआ करसानें गी बक्ख–बक्ख सरकारी योजना दे लाह् बारे जानकार बना’रदा ऐ। इंदे चा समग्र कृषि विकास कार्यक्रम, राष्ट्रीय पशु धन मिशन, एकीकृत डेयरी विकास परियोजना ते होरनी प्रमुख योजना शामिल न। मैह्कमे आस्सेआ करसानें गी प्रभावी टीकाकरण कार्यक्रमें दे राएं माल बच्छें दी सुरक्षा लेई ते दुध उत्पादन च बाद्धा करने लेई वैज्ञानिक तरीके बारे शिक्षित कीता जा’रदा ऐ। एह्दे अलावा मैह्कमा दुध गी किट्ठा करने सरबंधी ऑटोमैटिक मिल्क कोलेक्शन यूनिट पर 6 लक्ख रपे दी सब्सिडी देआ’रदा ऐ। इस बारे च आकाशवाणी समाचार कन्नै गल्ल करदे होई रामबन थमां इक लाभार्थी गुलाम मुस्तफा होरें आखेआ.....बाईट

<><><><><><>

PPC Poonch

पुंछ जिले दे तकरीबन 16 सौ स्कूलें प्रधानमंत्री नरेन्द्र मोदी हुंदी परीक्षा पे चर्चा कार्यक्रम गी सुनेआ। अपने इस कार्यक्रम च उनें विद्यार्थिएं कन्नै मतेयानें सरबंधी तनाह् गी घट्ट करने ते शैक्षणिक चुनौतिएं कन्नै निबड़ने बारे गल्ल कीती। जिले च मुख्य आकर्षण कब्जा रेखा कन्नै लगदे के.जी.सेक्टर कश स्थित सरकारी मिडल स्कूल धन्नत रेआ। सीमित संसाधने दे बावजूद अध्यापकें इस गल्ला गी जकीनी बनाया जे विद्यार्थी इस कार्यक्रम गी दिक्खी सकन।

<><><><><><>

PPC Udhampur(byte)

जगतें दे सरकारी हायर सकेँडरी स्कूल उधमपुर च बी परीक्षा पे चर्चा कार्यक्रम दा सरिस्ता कीता गेआ। एह्दे च विद्यार्थिएं, अध्यापकें ते अभिभावकें हिस्सा लैता। इस दरान सब्बने इस कार्यक्रम गी सुनेआ। इस बारी एह

कार्यक्रम रिवायती तरीके कन्नै इक हाल च नेई होआ। प्रधानमंत्री होरें विद्यार्थिएं कन्नै नमीं दिल्ली दी सुंदर नर्सरी च अन औपचारिक तौर पर मलाटी कीती ते उंदे कन्नै गल्लबात कीती। उनें अभिभावकें गी आखेआ जे ओह् अपने बच्चें गी लोकें सामने पेश करने आले नमूने नेई समझन। उनेंगी अपने बच्चें दी दुए कन्नै तुलना नेई करनी लोड़चदी। प्रधानमंत्री हुंदे इस जतन बारे अपने बचार सांझा करदे होई स्कूल दे प्रिंसिपल ते इक विद्यार्थी नै गलाया.....बाईट

<><><><><><>